

Un storia berdad cu hopi ciudadano no sa

**Di nos Himno y Bandera
Pa: Joy Kock**

Tabata dia 17 di Maart 1976, bispo di inauguracion di nos Himno y bandera. Pa banda di 6.30 di atardi Joy Kock a ricibi un yamada telefonico na su cas, di Sr. Tico Kuiperi d.f.m, hefe di protocol di Gobiernodi Aruba. Tico Kuiperi a puntra Joy Kock si ta posibel cu mañan anochi dia 18 di Maart 1976 e Orquesta Filarmonico di Aruba por a toca e himno di Aruba pa prome biaha oficialmente.

Joy a contesta Tico cu el a scucha na radio cu ta coro "Vivons en Chantant" lo tin e honor grandi aki. Joy a agrega cu e coro ta un excelente coro. Tambe Joy a bisa Tico cu e ta toca tur anochi na Caribbean Hotel pero conta cu su aporte.

Tico a splica Joy cu e direc-



tiva y no e coristanan ni e director a laga su nan lo no participa mas, pa motibo politico. Joy a bisa Tico cu e lo haci tur su posibel.

Despues di 30 minuut Fifi Eman presidente di e comision inauguracion di Himno y Bandera a yama Joy cu e mesun splicacion. Banda di

8'or anochi Betico Croes a splica Joy via telefon un biaha mas kico a pasa cu e coro. Joy a contesta Betico cu lo bay tin orquesta y coro y pa Betico no preocupa, tur

cos lo bay bon.

Dia 18 di Maart 1976 den un solo cayente 3'or di atardi Orquesta Filarmonico bao direccion di Joy Kock y e coro juven'l bao direccion di Maybelline Arends-Croes a train.

Anochi e orquesta mahestuosamente a compaña e coro juven'l dilanti di miles y miles di hende cu awa na wowo a scucha nos Himno y mira nos bandera bay halto pa promer biaha oficialmente. Betico, Joy, Tico, Fifi y Edi Jong semper a keda gran amigonan di otro.

Esaki ta un storia berdad cu dentro di 24 ora, Joy Kock a percura pa orquesta y coro pa e inauguracion oficial di nos simbolonan di libertad. Awe 18 di Maart nos mester rindi homenahe na Betico cu a duna nos Bandera, Himno, Ortografia, moneda, Aerolinea nacional, Instituto di Cultura, reapertura di e refineria y riba tur esaki nos libertad, nos Status Aparte.